



中国经典名著

全唐诗

(三十一)

黄怀仁 齐思明 校正

学苑音像出版社

目 录

第五百六十六卷.....	1
第五百六十七卷.....	9
第五百六十八卷.....	18
第五百六十九卷.....	40
第五百七十卷.....	71
第五百七十一卷.....	93
第五百七十二卷.....	113
第五百七十三卷.....	142
第五百七十四卷.....	178
第五百七十五卷.....	209
第五百七十六卷.....	220
第五百七十七卷.....	231
第五百七十八卷.....	243
第五百七十九卷.....	262
第五百八十卷.....	270
第五百八十一卷.....	278
第五百八十二卷.....	289
第五百八十三卷.....	301

第五百六十六卷

和襄阳徐相公商贺徐副使加章绶

王传

朱紫联辉照日新，芳菲全属断金人。华筵重处宗盟地，
白雪飞时郢曲春。仙府色饶攀桂侣，莲花光让握兰身。
自怜亦是膺门客，吟想恩荣气益振。

和李尚书命妓饯崔侍御

卢邺

何郎载酒别贤侯，更吐歌珠宴庾楼。
莫道江南不同醉，即陪舟楫上京游。

松

陆肱

雪霜知劲质，今古占嘉名。断砌盘根远，疏林偃盖清。
鹤栖何代色，僧老四时声。郁郁心弥久，烟高万井生。



赠王福娘（一作赠美人）

崔澹

怪得清风送异香，娉婷仙子曳霓裳。
惟应错认偷桃客，曼倩曾为汉侍郎。

答问读书居

莫宣卿

书屋倚麒麟，不同牛马路。床头万卷书，溪上五龙渡。
井汲冽寒泉，桂花香玉露。茅檐无外物，只见青云护。

百官乘月早朝听残漏

莫宣卿

建礼俨朝冠，重门耿夜阑。碧空蟾魄度，清禁漏声残。
候晓车舆合，凌霜剑佩寒。星河犹皎皎，银箭尚珊珊。
杳霭祥光起，霏微瑞气攒。忻逢圣明代，长愿接鹓鸾。

赋得水怀珠

莫宣卿

长川含媚色，波底孕灵珠。素魄生蘋末，圆规照水隅。



沦涟冰彩动，荡漾瑞光铺。迴夜星同贯，清秋岸不枯。
江妃思在掌，海客亦忘躯。合浦当还日，恩威信已敷。

句

莫宣卿

我本南山凤，岂同凡鸟群。（见《封川志》）

和李尚书命妓饯崔侍御

封彦卿

莲府才为绿水宾，忽乘骢马入咸秦。
为君唱作西河调，日暮偏伤去住人。

赠释疏言还道林寺诗

李节

湘川猎猎兮俗犷且很，利杀业偷兮吏莫之驯。
繫释氏兮易暴使仁，释何在兮释在斯文，
湘水滔滔兮四望何依，猿狖腾拏兮云树飞飞。
月沉浦兮烟暝山，檣席卷兮櫓床闲。偃仰兮啸咏，
鼓长江兮何时还。



湘川超忽兮落日晷晷，松覆秋亭兮兰被春苑。

上人去兮几千里，何日同游兮湘川水。

和柯古穷居苦日喜雨

韦蟾

贞机澹少思，雅尚防多僻。揽葛犹不畏，劳形同处瘠。
头焦讵是焚，背汗宁关炙。方欣见润础，那虞悲铄石。
道与古人期，情难物外适。几怀朱邸绶，颇旷金门藉。
清奥已萧萧，陈柯将槭槭。玉律诗调正，琼卮酒肠窄。
衣桁袭中单，浴床抛下绌。黎侯寓于卫，六义非凡格。

岳麓道林寺

韦蟾

石门迴接苍梧野，愁色阴深二妃寡。广殿崔嵬万壑间，
长廓诘曲千岩下。静听林飞念佛鸟，细看壁画驮经马。
暖日斜明蟠螭梁，湿烟散幂鸳鸯瓦。北方部落檀香塑，
西国文书贝叶写。坏栏迸竹醉好题，窄路垂藤困堪把。
沈裴笔力斗雄壮，宋杜词源两风雅。他方居士来施斋，



彼岸上人投结夏。悲我未离扰扰徒，劝我休学悠悠者。
何时得与刘遗民，同入东林远公社。

上元三首

韦蟾

新正圆月夜，尤重看灯时。累塔嫌沙细，成文讶笔迟。
归牛疑燧落，过雁误书迟。生惜兰膏烬，远为隔岁期。
举烛光才起，挥毫势竞分。点时惊坠石，挑处接崩云。
辞异秦丞相，铭非窦冠军。唯愁残焰落，逢玉亦俱焚。
多宝神光动，生金瑞色福。照人低入郭，伴月夜当楼。
熏穴应无取，焚林固有求。夜阑陪玉帐，不见九枝留。

梅

韦蟾

高树临溪艳，低枝隔竹繁。何须是桃李，然后欲忘言。
拟折魂先断，须看眼更昏。谁知南陌草，却解望王孙。



送卢潘尚书之灵武

韦蟾

贺兰山下果园成，塞北江南旧有名。水木万家朱户暗，
弓刀千队铁衣鸣。心源落落堪为将，胆气堂堂合用兵。
却使六番诸子弟，马前不信是书生。

题僧壁

韦蟾

一竹横檐挂净巾，灶无烟火地无尘。
剃头未必知心法，要且闲于名利人。

赠商山僧

韦蟾

商岭东西路欲分，两间茅屋一溪云。
师言耳重知师意，人是人非不欲闻。



长乐驿谑李汤给事题名

韦蟾

渭水秦川拂眼明，希仁何事寡诗情。
只应学得虞姬婿，书字才能记姓名。

句

韦蟾

争挥钩弋手，竞耸踏摇身。伤颊讵关舞，捧心非效嚬。
(襄阳风光亭夜宴有妓醉殴赋。见《纪事》)

赋得寿星见

卢渥

玄象今何应，时和政亦平。祥为一人寿，色映九霄明。
皎洁垂银汉，光芒近斗城。含规同月满，表瑞得天清。
甘露盈条降，非烟向日生。无如此嘉祉，率土荷秋成。

题嘉祥驿

卢渥

交亲荣饯洛城空，秉钺戎装上将同。星使自天丹诏下，



雕鞍照地数程中。马嘶静谷声偏响，旆映晴山色更红。
到后定知人易化，满街棠树有遗风。

九华山

郭夔

岩翠凌云出迥然，岩峣万丈倚秋天。暮风飘送当轩色，
晓雾斜飞入槛烟。帘卷倚屏双影聚，镜开朱户九条悬。
画图何必家家有，自有画图来目前。

送莫仲节状元归省

柳珪

青骢聚送谪仙人，南国荣亲不及君。椰子味从今日近，
鹧鸪声向旧山闻。孤猿夜叫三湘月，匹马时侵五岭云。
想到故乡应腊过，药栏犹有异花薰。



第五百六十七卷

津阳门诗

郑嵎

津阳门北临通逵，雪风猎猎飘酒旗。泥寒款段蹶不进，
疲童退问前何为。酒家顾客催解装，案前罗列樽与卮。
青钱琐屑安足数，白醪软美甘如饴。开垆引满相献酬，
枯肠渴肺忘朝饥。愁忧似见出门去，渐觉春色入四肢。
主翁移客挑华灯，双肩隐膝乌帽欹。笑云鲐老不为礼，
飘萧雪鬓双垂颐。问余何往凌寒曦，顾翁枯朽郎岂知。
翁曾豪盛客不见，我自为君陈昔时。时平亲卫号羽林，
我才十五为孤儿。射熊搏虎众莫敌，弯弧出入随伙飞。
此时初创观风楼，檐高百尺堆华榱。楼南更起斗鸡殿，
晨光山影相参差。其年十月移禁仗，山下栉比罗百司。
朝元阁成老君见，会昌县以新丰移。幽州晓进供奉马，
玉珂宝勒黄金羈。五王扈驾夹城路，传声校猎渭水湄。
羽林六军各出射，笼山络野张置维。雕弓绣鞬不知数，
翻身灭没皆蛾眉。赤鹰黄鹞云中来，妖狐狡兔无所依。
人烦马殆禽兽尽，百里腥膻禾黍希。暖山度腊东风微，
宫娃赐浴长汤池。刻成玉莲喷香液，漱回烟浪深逶迤。



犀屏象荐杂罗列，锦帛绣雁相追随。破簪碎钿不足拾，
金沟残溜和纓綉。上皇宽容易承事，十家三国争光辉。
绕床呼卢恣樗博，张灯达昼相谩欺。相君侈拟纵骄横，
日从秦虢多游嬉。朱衫马前未满足，更驱武卒罗旌旗。
画轮宝轴从天来，云中笑语声融怡。鸣鞭后骑何躩蹀，
宫妆襟袖皆仙姿。青门紫陌多春风，风中数日残春遗。
骊驹吐沫一奋迅，路人拥篲争珠玑。八姨新起合欢堂，
翔鸞贺燕无由窥。万金酬工不肯去，矜能恃巧犹嗟咨。
四方节制倾附媚，穷奢极侈沽恩私。堂中特设夜明枕，
银烛不张光鉴幔。瑶光楼南皆紫禁，梨园仙宴临花枝。
迎娘歌喉玉窈窕，蛮儿舞带金葳蕤。三郎紫笛弄烟月，
怨如别鹤呼羈雌。玉奴琵琶龙香拨，倚歌促酒声娇悲。
饮鹿泉边春露晞，粉梅檀杏飘朱墀。金沙洞口长生殿，
玉蕊峰头王母祠。禁庭术士多幻化，上前较胜纷相持。
罗公如意夺颜色，三藏袈裟成散丝。蓬莱池上望秋月，
无云万里悬清辉。上皇夜半月中去，三十六宫愁不归。
月中秘乐天半间，丁珰玉石和埙篪。宸聪听览未终曲，
却到人间迷是非。千秋御节在八月，会同万国朝华夷。
花萼楼南大合乐，八音九奏鸾来仪。都卢寻橦诚齷齪，



公孙剑伎方神奇。马知舞彻下床榻，人惜曲终更羽衣。
禄山此时侍御侧，金鸡画障当罟罟。绣衣 褫日质，
甘言狡计愈娇痴。诏令上路建甲第，楼通走马如飞翬。
大开内府恣供给，玉缶金筐银簸箕。异谋潜炽促归去，
临轩赐带盈十围。忠臣张公识逆状，日日切谏上弗疑。
汤成召浴果不至，潼关已溢渔阳师。御街一夕无禁鼓，
玉辂顺动西南驰。九门回望尘坌多，六龙夜馭兵卫疲。
县官无人具军顿，行宫彻屋屠云螭。马嵬驿前驾不发，
宰相射杀冤者谁。长眉鬢发作凝血，空有君王潜涕洟。
青泥坂上到三蜀，金堤城边止九旂。移文泣祭昔臣墓，
度曲悲歌秋雁辞。明年尚父上捷书，洗清观阙收封畿。
两君相见望贤顿，君臣鼓舞皆歔歔。宫中亲呼高骠骑，
潜令改葬杨真妃。花肤雪艳不复见，空有香囊和泪滋。
銮輿却入华清宫，满山红实垂相思。飞霜殿前月悄悄，
迎春亭下风飕飕。雪衣女失玉笼在，长生鹿瘦铜牌垂。
象床尘凝罨飒被，画檐虫网颇梨碑。碧菱花覆云母陵，
风篁雨菊低离披。真人影帐偏生草，果老药堂空掩扉。
鼎湖一日失弓剑，桥山烟草俄霏霏。空闻玉碗入金市，
但见铜壶飘翠幔。开元到今逾十纪，当初事迹皆残隳。



竹花唯养栖梧凤，水藻周游巢叶龟。会昌御宇斥内典，
去留二教分黄缁。庆山污瀦石瓮毁，红楼绿阁皆支离。
奇松怪柏为樵苏，童山谿谷亡嶮巇，烟中壁碎摩诘画，
云间字失玄宗诗。石鱼岩底百寻井，银床下卷红绶迟。
当时清影荫红叶，一旦飞埃埋素规。韩家烛台倚林杪，
千枝灿若山霞摛。昔年光彩夺天月，昨日销熔当路岐。
龙宫御榜高可惜，火焚牛挽临崎岖。孔雀松残赤琥珀，
鸳鸯瓦碎青琉璃。今我前程能几许，徒有馀息筋力羸。
逢君话此空洒涕，却忆欢娱无见期。主翁莫泣听我语，
宁劳感旧休吁嘻。河清海宴不难睹，我皇已上升平基。
湟中土地昔湮没，昨夜收复无疮痍。戎王北走弃青冢，
虜马西奔空月支。两逢尧年岂易偶，愿翁颐养丰肤迹。
平明酒醒便分首，今夕一樽翁莫违。

春日即事

崔櫓

一百五日又欲来，梨花梅花参差开。行人自笑不归去，
瘦马独吟真可哀。杏酪渐香邻舍粥，榆烟将变旧炉灰。
画桥春暖清歌夜，肯信愁肠日九回。



春晚岳阳言怀二首

崔櫓

烟花零落过清明，异国光阴老客情。云梦夕阳愁里色，
洞庭春浪坐来声。天边一与旧山别，江上几看芳草生。
独倚阑干意难写，暮笳呜咽调孤城。

翠烟如钿柳如环，晴倚南楼独看山。江国草花三月暮，
帝城尘梦一年间。虚舟尚叹萦难解，飞鸟空惭倦未还。
何以不羁詹父伴，睡烟歌月老潺潺。

过蛮溪渡

崔櫓

绿杨如发雨如烟，立马危桥独唤船。山口断云迷旧路，
渡头芳草忆前年。身随远道徒悲梗，诗卖明时不直钱。
归去楚台还有计，钓船春雨日高眠。

岸梅

崔櫓

含情含怨一枝枝，斜压渔家短短篱。惹袖尚馀香半日，



向人如诉雨多时。初开偏称雕梁画，未落先愁玉笛吹。
行客见来无去意，解帆烟浦为题诗。

重阳日次荆南路经武宁驿

崔櫓

茱萸冷吹溪口香，菊花倒绕山脚黄。家山去此强百里，
弟妹待我醉重阳。风健早鸿高晓景，露清圆碧照秋光。
莫看时节年年好，暗送搔头逐手霜。

述怀

崔櫓

白首成何事，无欢可替悲。空馀酒中兴，犹似少年时。

三月晦日送客

崔櫓

野酌乱无巡，送君兼送春。明年春色至，莫作未归人。



华清宫三首

崔櫓

草遮回磴绝鸣銮，云树深深碧殿寒。
明月自来还自去，更无人倚玉栏干。
障掩金鸡蓄祸机，翠华西拂蜀云飞。
珠帘一闭朝元阁，不见人归见燕归。
门横金锁悄无人，落日秋声渭水滨。
红叶下山寒寂寂，湿云如梦雨如尘。

题云梦亭

崔櫓

薄烟如梦雨如尘，霜景晴来却胜春。
好住池西红叶树，何年今日伴何人。

有酒失于虔州陆郎中肱，以诗谢之

崔櫓

醉时颠蹶醒时羞，麹蘖推人不自由。
叵耐一双穷相眼，不堪花卉在前头。

